

BERITA HARIAN

DATE: 27/9/2009

Samy patut cuti 20 tahun: Dr M

BH- 27/9/2009

KUALA LUMPUR: Tun Dr Mahathir Mohamad menyifatkan penubuhan Parti Makkal Sakthi adalah langkah terbaik sebagai alternatif untuk memastikan sokongan kaum India terhadap kerajaan Barisan Nasional (BN) dapat diraih semula.

Bekas Perdana Menteri itu berkata, parti itu juga mampu menjadi pengganti kepada MIC yang dilihat semakin kehilangan pengaruh di kalangan kaum India di negara ini.

"Saya lihat banyak sokongan terhadap penubuhannya dan ia juga bagi memastikan sokongan kaum India tidak hilang," katanya pada sidang media selepas mengadakan majlis rumah terbuka Aidilfitri di kediamannya di Seri Kembangan di sini, semalam.

Kelmarin, Presiden Makkal Sakthi, RS Thanenthiran, berkata Perdana Menteri, Datuk Seri Najib Razak dijangka melancarkan penubuhan parti itu pada 10 Oktober ini.

Thanenthiran berkata, kira-kira 50,000 ahli sudah menyertainya dan urusan penubuhan bahagian dan cawangan sedang dijalankan di

seluruh negara, sekali gus dijangka menjadi alternatif kepada masyarakat India yang mencari pentas politik baru.

Makkal Sakthi ialah serpihan pertubuhan haram Hindraf, malah Thanenthiran sendiri pernah menjadi penyelaras pergerakan itu.

Diminta mengulas hasrat Datuk Seri S Samy Vellu untuk bercuti daripada menjalankan tugas sebagai Presiden MIC selama dua bulan untuk membolehkan timbalannya, Datuk G. Palanivel menjalankan tugas itu, Dr Mahathir berkata, Samy sepatutnya memanjangkan cutinya itu sehingga 20 tahun.

Sambil menyindir dengan mengatakan tempoh cuti dua bulan itu tidak mencukupi, beliau berkata, Samy sepatutnya bertindak lebih bijak dengan melepaskan jawatannya bagi mengelakkan lebih ramai orang membencinya.

"Samy sudah duduk di situ 30 tahun dan lebih lama daripada saya...saya yang 22 tahun (menjadi Perdana Menteri) pun sanggup letak jawatan dan ketika itu, bukan disebabkan orang benci tetapi dia (Samy) duduk lagi lama di situ, lagi orang ben-

ci," katanya.

Sementara itu, bekas Timbalan Presiden MIC, Datuk S Subramaniam, berkata beliau akan membuat keputusan berhubung hala tuju politiknya dalam tempoh seminggu lagi.

Subramaniam tewas kepada Datuk G Palanivel dalam perebutan jawatan nombor dua MIC ketika pemilihan pada 12 September lalu.

Dalam isu lain, Dr Mahathir mengulangi pendirian tidak bersetuju sekiranya Umno mencalonkan Ketua Umno Bahagian Teluk Kemang, Tan Sri Isa Samad sebagai calon pilihan raya kecil Dewan Undangan Negeri (DUN) Bagan Pinang pada 10 Oktober ini.

Beliau juga menyifatkan pihak yang mengemukakan saranan itu sebagai 'berpandangan singkat' dan hanya melihat kepentingan sendiri.

"Kalau saya jadi Isa, saya sendiri akan minta supaya jangan calonkan saya, sebaliknya saya akan berusaha untuk bagi mana-mana calon yang dipilih dan berkempen untuk dia. Dengan itu nama Isa akan jadi cukup harum," katanya.